

COMUNICATO n. 3150 del 25/10/2025

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 25 de otober vegn fora la puntata #509 del program ladin per la television

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 509. I argomenc che vegn portà dant te la puntata de chesta setemèna l é:

L benvegnù a Don Mario Bravin da pèrt de la Curazies de la val de sot che en domenia passèda les à endrezà na gran festa te geja de la Madona del Aiut a Poza. Purampò ge vel dir che da ades inant sarà n preve soul per duta Fascia e l cognarà se rejer ot curazies. Duta la comunanza la lo à tout dant de bon cher e la ge à fat a saer che la ge stajarà apede e la vardarà de portèr so didament te sia miscion. Ence per chest don Mario l à dit che no l é sprigolà e che l fat de aer la jent apede ge dèsc “forza e coragio”. Amò apede, a didèr do, sarà ence l capelan de Ciavaleis e don Bruno da Moena.

La Domenia del Rengraziament de chest an la é stata dedichèda ai 70 egn de la Union di Ladins de Fascia. Per l’ocajion l é stat fat na festa olache l é stat recordà i fondadores che i à sotscriu l prum statut: don Massimiliano Mazzel, Giacomo Jellici, Simone Sommariva e Giovanni Rizzi. Apede, l é stat portà dant i venjidores del concurs “Let’s Stick Ladin”; na bela pissèda che co la vertola de n adesif l’à soscedà enteres, curiosità e devertiment a chela che à tout pèrt sacotenc gropes e n muie de joegn. L é amò da dir che per i 70 egn, l’Union l’à amò en program la prejentazion de n liber per contèr di fac e di avvenimenc de sia storia.

Te l’ultima sescion del Consei General chiamèda ite en mercol ai 15 de otober, l era 13 ponc al orden del dì; anter chisc la mozion per tor pèrt al apel “Salviamo Gaza” e la nomina de trei comiscions: chela istituzionèla, chela per la scola ladina e chela per la toponomastica. Con chesta nomines de carater organisatif e operatif, la neva aminstrazion del Comun General la se enjigna a meter en esser i obietives e i projec desche pervedù da la linees programatiches.

L FAI de Fascia e Fiem l à endrezà n fin de setemèna de raides e spazirèdes anter L Forn, Medil e Valsorda per cognoscer sia storia, traditions e ambient. Più avisa, col didament de esperc de storia locala, l program l pervedea de jir a veder la cava de la bores e la scrives di pèstres de Valsorda fates amò del 1800 col bol del Latemar. Lesc de marevea e riches de curiositèdes che à soscedà l enteres de chi che à tout pèrt.

I reports de chesta setemèna i é stac enjigné e porté dant da Angela Pederiva e Riccardo Zanon.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdì) e de lunesc da les 11.30 (mesa les doudesc) e sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina.

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)